



Directivas per la construcziun d'agids da catscha

relaschadas entras

la vischnaunca da Sumvitg

1. Basas legalas

Agids da catscha (definiziun mira giusut) sin territori d'uaul representan giuridicamente baghetgs pigns buca forestals che basegnan negina damonda da runcada (art. 27 LCG, art. 17 OCG). Perencunter sto vegin dumandau per il consentiment dil survetsch forestal (art. 18 OCG) resp. dil possessur d'uaul.

2. Definiziun d'agids da catscha

piazza da seser	pazzas semplas da seser ord romà per tiara, senza travestgida laterala e tetg; ei resulta negins donns vid la plonta entras guottas, ferradira e.a.v. ed/ni entras ligiar giu cun fildirom, sugaras etc.
sez ault movibel	sez ault ord alumini, material sintetic e.a.v. cun ni senza scala integrada che vegin pusaus enviers ina plonta ni fixaus cun tschentas entuorn il best dalla plonta.
sez ault	basa sin combas-lenn (lattas ni bests da plontas) ni sin in pégn cun generusa surfatscha da basa e da seser, travestgida laterala, cun ni senza tetg.
hetta da laghetg temporara	hetta da laghetg che vegin montada sil pli baul l'entschatta settember e demontada sil pli tard el decuors digl avrel.
hetta da laghetg permanenta	hetta da laghetg che resta permanentamein el liug.
largia da sittar	allontanament da singulas plontas per saver sittar sin la selvaschina giu dad in post da catscha (sez ault ni sez bass).

3. Directivas

- a) Pazzas da seser basegnan negina lubientscha ufficiala, aschi lunsch che las pretensiuns vid talas vegin respectadas, v.d. negin material jester e negins donns vid la plonta.
- b) Damondas per la construcziun d'agids da catscha ein da far cul formular ufficial per mauns digl uffeci forestal.
- c) Mintga singul sez ei d'annunziar individualmein cun in formular.
- d) Sezs aults e hettas da laghetg ein da nudar bein veseivlamein cun la numera che vegin attribuida entras la vischnaunca.

- e) Sezs aults e hettas da laghetg che veggan buca utilisadas pli ston veginir allontanadas entras il possessur. Igl allontanament ei d'annunziar agl uffeci forestal resp. al proprietari d'uaul. Succeda negin allontanament, procura igl uffeci forestal per tal. Ils cuosts veggan adossai al possessur pertuccau.
- f) Sezs aults e hettas da laghetg che midan possessur ein d'annunziar agl uffeci forestal resp. al proprietari d'uaul cun in niev formular ufficial.
- g) La catscha giud sezs aults resp. ord hettas da laghetg ha da succeder conform allas perscripcziuns da catscha.
- h) Ils indrezs da catscha (sezs aults, hettas da laghetg) ston veginir construui aschia ch'ei resulta negins donns vid singulas plontas ed igl uaul. En special eis ei scumandau da pitgar ferradira ellas plontas per fixar aissas, sezs ni scalas.
- i) Ei astga veginir construui negins fundamenti cun material jester (p.ex. betun).
- j) Material da fildirom, sugas e.a.v. sto veginir applicaus aschia che tiarzas persunas e selvaschina veggan buca periclitadas.
- k) Il volumen maximal dalla construcziun cumporta a 5.0 m³.
- l) Il material da construcziun sto esser naturals ed astga buca esser tractaus cun mieds chemics.
- m) Indrezs per metter estga ston veginir allontanai ladinamein suenter la sesiun da catscha da laghetg, sil pli tard denton tochen la fin avrel. Donns caschunai ston veginir refatgs.
- n) Per la segirtad dils sezs aults resp. las hettas da laghetg ei il possessur responsabels cumpleinamein. La vischnaunca refusa tutta responsabladad per accidents e donns che resultan, quei era enviers tiarzas persunas.
- o) Tier eveniments specials ni situaziuns extraordinarias (p.ex. lenna dil bau, lenna derschida ...) sa il selvicultur pretender da tut temps igl allontamanet immediat dils indrezs da catscha, sche quels impedeschon las lavurs forestalas. Cheutras resulta negin dretg d'indeminsaziun pil possessur.
- p) Largias da sittar astgan veginir fatgas mo cul consentiment digl uffeci forestal resp. dil proprietari d'uaul. Las lavurs astgan veginir exequidas pér suenter la marcaziun entras il selvicultur. La gruppa forestala segida vid resgiar ora largias da sittar en loghens che gl'uaul veggan tgiraus, aschilunsch che la vischnaunca ha buca cuosts supplementars.
- q) Largias da sittar han da secumportar cun las finamiras dalla tgira digl uaul. Largias da sittar lubidas ed englars duei il catschadur tener liber tenor basegns.
- r) Cunterfatgas enviers leschas e la directiva avon maun veggan punidas.

Questas directivas ein veggidas approbadas dalla suprastonza communala en la seduta dils 23 da december 2015 (protocol 21-2015) e passan en vigur cun ils 1 da schaner 2016.

Suprastonza communalala Sumvitg

Il president



Armin Candinas

Igl actuar



Fabian Collenberg